



Akcija SIPA u Unsko-sanskom kantonu

NOVI PODACI O ZLOČINIMA NAD SRBIMA

Pripadnici SIPA pretresli devet lokacija, a cilj je otkriti dokaze o zločinima u Bosanskoj Krupi

Postupajući po naredbama Suda BiH i Tužilaštva BiH, policijski službenici Državne agencije za istrage i zaštitu (SIPA) jučer su pretresli devet lokacija na području Unsko-sanskog kantona, koji su u vlasništvu osoba inicijala J. Š, S. Š, Z. K. i F. H.

Veza sa Kastelom

Dok smo pokušavali provjeriti identitete koji stoje iza inicijala, objavilo se i Tužilaštvo BiH sa ispravkom da navedene osobe čiji su objekti predmet pretresa nemaju status osumnjičenih lica, jer u navedenom predmetu još nije donesena naredba o provođenju istrage protiv konkretnih imena.

- Radi se o osobama kod kojih

bi se mogli nalaziti materijali i dokazi potrebni za istragu Tužilaštva BiH. Predmet na kojem radi Tužilaštvo BiH odnosi se na ratne zločine počinjene nad žrtvama srpske nacionalnosti na području Bosanske Krupe tokom 1995. i 1996. godine, a radi se o zločinima protiv civilnog stanovništva i zločinima protiv ratnih zarobljenika. Istraga je u ranoj fazi, a današnjim pretresima očekuje se da će biti pronađena i oduzeta dokumentacija koja bi mogla poslužiti kao dokaz u istrazi, navedeno je u dopisu Tužilaštva BiH.

Nezvanično saznajemo da su pretresi vršeni na prostoru općina Bihać i Bosanska Krupa, a špekuliraju se kako se dio tražene



dokumentacije dovodi u vezu i sa policijskim službama.

U MUP-u Unsko-sanskog kantona su nam potvrdili da asistiraju uposlenima SIPA u akciji, ali ne i da su policijske zgrade ili njihovi službenici predmet ove istrage.

Cijela akcija se dovodi u vezu sa akcijom Kastel od prije dvije godine, u kojoj je policijski komesar Ramo Brkić uhapšen, pa su sasvim slučajno pronašli zanimljive dokumente iz rata. Nedugo potom, 8. novembra 2011, SIPA je izvršila pretres u bivšoj kasarni 5. korpusa Orljani. U objektima osumnjičenih iz Kastela, te u ovom bivšem vojnom objektu navodno su nađene godinama stare krivične prijave,

koje nikada nisu provjerene, pa tako ni procesuirane, a navodno ima i onih za ratne zločine.

Identifikacija

I ova jučerašnja akcija ima za cilj pronalaženje upravo takve dokumentacije.

- Dokumentacije koja može poslužiti radi identifikacije i pronalazača počinilaca krivičnog djela iz člana 173. KZBiH - Ratni zločin protiv civilnog stanovništva. Prilikom pretresa pronađena je i privremeno izuzeta određena dokumentacija iz perioda 1995 - 1996, koja će biti dostavljena na dalje postupanje Sudu BiH, uz upoznavanje postupajućeg tužioca BiH, potvrđeno je iz SIPA.

F. BENDER